

RETAKARI ROSANKENATZINIRI PABLO TESALÓNICA-SATZI

Wethataantsi

1 ¹Naaka Pablo osankenatzimirori jiroka notsipatari Silvano eejatzi Timoteo. Notyaantzimiro janta Tesalónica-ki pashiite pikaataiyinira rashiyetaimi Pawa eejatzi Awinkatharite Jesucristo. Onkamintha ineshironkayetaimi, risaikakaayetaimi kameetha.

Roshiyakoitari Tesalónica-satzi

²Arika namanakotemi, antawoite niwetharyaari Pawa. ³Osheki nokenkithashiryaakotakero okaatzi pantanairi poshoretanaarira, iñagaitzimi petakoyetantzi, pikamaitanaawo poyaawentziri Awinkatharite Jesucristo. ⁴Niyotzi iyekiite, retakotaimi Pawa iri iyoyaayetaimiri. ⁵Piyotaiyini eerokapaini te nonkenkithatakaashitemiro Kameethari Ñaantsi nisaikimotantakemiri, Tasorenkantsi aawyaashiretakaakenari, niyotantawori kyaaryooperori nokamantayetzimiri. Piñaayetakena tsika nokanta nisaikimotakemi, osheki nokowaiyakemini. ⁶Okantaweta pikemaatsiwetawo, iro kantzimaitacha kemisantaimi, tema Tasorenkantsi oimoshirenkaimiri. Pimatairo okaatzi nantziri naaka eejatzi okaatzi rantakeri Awinkatharite. ⁷Iro opoñaantari roshiyantaimiri ikaatzi kemisantaatsiri Macedonia-ki eejatzi Acaya-ki. ⁸Tera apaani kemakotaimine jimpe pikanta pikemisantairi Pawa, ithonka ikemakoitaimi tsikarikapaini. Nokowawetaka nonkamanterime jimpe pikanta pikemisantantaari eerokapaini, ⁹iri etawakawo ikamantawakena tsika pikantayetaka paakameethatakena, tsika pikanta pipakaanairi piwawanewetari, pantanairo ikowiri Kañaaneri Pawa Kyaaryooperori. ¹⁰Ikamantakenawo eejatzi jimpe pikanta poyaawentziri Jesús ripiye inkenapairo inkiteki, tema iri Pawa ashitariri rowañagairi ikamawetakaga. Iri owawisaakoshiretaine arika imonkaataiya rowasanketantai.

Rantayetakeri Pablo Tesalónica-ki

2 ¹Iyekiite, piyotaiyini eeroka te aminaashita niyaatake nareetzimi. ²Pairani tekera niyaatziita pisaikaiyinira eeroka, osheki ikisaneentaitakena Filipos-ki, rowasankewaitaitakena eejatzi. Iri kantzimaitacha iri Pawa shintsishiretakaakenari nokenkithatakaantzimiro Kameethari Ñaantsi, okantawetaka ikisaneentaitana. ³Te nokenakaashitawo niñaaneyetari, te nokaariperoshiretzi nokenkithatakaakemiro, te namatawitzimi. ⁴Tema Pawa ñaantashiretakenari naaka, rotyaantakena nonkenkithatakaimiro Kameethari Ñaantsi, iro kaari nokenkithatantapaakawo inimotziriri atziri, apatziro nokenkithatakero inimotziriri Pawa, iri yoshiretantatsiri. ⁵Piyotaiyini te nonintathatantzimiro okaatzi nokenkithatakaakemiro, naantantyaawori osheki koriki. Iri yotzirori Pawa. ⁶Te nokowiro pimpinkathatashitena. Okantawetaka naaka rotyaantaperotane Cristo, impinkathaitename. ⁷Iro kantzimaitacha noneshironkatane nowimi noshiyakotawo irinirotaitari arika aamaakotyaari eenchaanikite. ⁸Te apaani nonkenkithatakotemiro Kameethari Ñaantsi, antawoite netakotakemi, iro noñaashintsitakowentantzimiro.

⁹Tema pikenkithashiretairo netantanakawori nokenkithatzimiro riñaane Pawa, antawoite nantawaitake namanantantyaari nowanawo, kiteesheriki eejatzi tsireniriki nantawaitake. Irootake kaari pipashitantanawo eerokaite. ¹⁰Piyotaiyini jimpe nokanta nisaikimotakemi, eejatzi Pawa riyotzi irirori, kameethashire nokantaka, kiteshiretakena, tekaatsi itsipa kankakotenane. ¹¹Piyotzi eejatzi osheki netakotakemi, noshiyakotari ipaapateetari ikaminairi rowaiyane, ineshironkatziri, ishintsithatziri. ¹²Ari nokantakemi eeroka, onkene pantayetainiri ikowakaimiri Pawa, tema iri yoyaimiri, ari piñeero pisaikai ipinkathariwentantzira isaikira rowaneenkawo.

¹³Iro niyaatakaantawori niwetharyaanaari Pawa. Tema pairani owakera pikemawakena nokamantapaakemiro ñaantsi, piyotanake kaari riñaane atziri, irootake irooperori riñaane Pawa. Pikemisantakero, antakaayetaimiro okaatzi ikowakaimiri. ¹⁴Ari poshiyanaari ikaatzi kemisantairiri Jesucristo Judea-ki, tema antawoite rowasanketakeri Judá-ite isheninka. Ari ikantzitakemi pisheninka eeroka rowasanketakeri. ¹⁵Judá-itera tsitokakeriri pairani Jesús, irijatzi tsitokitakariri pairani Kamantantaneri. Iri omishitowakenari eejatzi naakapaini. Antawoite ikisaneentakeri atziripaini. Iro kaari inimotziri Pawa. ¹⁶Te ikowaiyini nonkenkithateniri ñaantsi kaari Judá-itetatsine, rawisakoshiretantaiyaari irirori. Iro ikaariperoshiretantakari Judá-ite, ari iñimaitaiyaawo rowasanketairi Pawa paata.

Risaikantakari Pablo intaina

¹⁷Iyekiite, osamani okantaka asaikimotawakaawetaka intaina, osheki nokenkithashiretakotapiintzimi. Iro kantzimaitacha nokowake napiitairo

añaawakaayetaiya. ¹⁸Nokowawetaka nareetemi, iri kantacha Satanás osheki rotzikatzikatakana. ¹⁹Iro kantzimaitacha paata arika ripiye Awinkatharite Jesucristo, eeroka oimoshirenkainane noñaantaiyaawori nonkimoshiretai. Eeroka kantakaakawori ripinaitantainari naaka. ²⁰Eeroka kantakayaawone paata noñaantaiyaawori nasagaawentantaimiri nonkimoshirewentantaimiri.

3 ¹Iro nokenkithashiretakari pairani nisaikira Atenas-ki, ²iri notyaantemiri Timoteo pisaikaiyinira eeroka. Tema jirika Timoteo iyeki rinatzi, tzimatsi osheki rantayetakeniriri Pawa. Ari notsipatakari noñaashintsitakawo nokenkithatakotziro Kameethari Ñaantsi tsika ikantakota Cristo. Tema arika rareetakya pisaikaiyinira, iri owatzinkashiretapaakemine, pinkimoshiretantaari piyaatakaairo pinkemisante. ³Te nokowi onkantzimoneentemi arika rowasanketaitemi. Ari okantari, iro awishimotaine. ⁴Iro nokantzitakemiri nisaikimotantzimiri, iroowa piñaakeri awishimotakemiri. ⁵Iro kantacha te nokisashitapaakawo naaka, nokowake niyote irojatzirika pikemisantaiyini. Kemetaka tzimatsi kowaintsiri inkaariperoshiretakaimi, ari aminaashiwaitaiyaani okaatzi nokamantawetakemiri pairani.

⁶Iro kantacha riyatake Timoteo rareetzimi, piyaawo nisaikira naaka. Ikamantapaakena eekero piyaatatzi pikemisantaiyini, petakotawakaiyani. Ikamantakena osheki poshoretapiintakena, pikowi piñeena, ari nokantzitakari naaka, nokowi noñeemi eeroka. ⁷Iyekiite, okantawetaka osheki rowasanketaitana jaka, thaamentashire nokanta, niyotake eekero piyaatatzi pikemisantaiyini eeroka. ⁸Niyotzi eekero piyaatatzi piriiperowentairi Awinkatharite, kameetha inimotakena nisaikira jaka. ⁹Antawoite niwetharyaari Pawa, eeroka matakero pikimoshiretakaaperotakena. ¹⁰Eekero nokamaitaayaawo namana kiteesheriki eejatzi tsireniriki, noñaantyaawori napiitero nareetemi, ari niwetsikemiro tzimatsirika pikenakaashitari pikemisantzira.

¹¹Iri nokowakotzi Ashitairi Pawa, eejatzi Awinkatharite Jesús, tampatzika nowanakero niyaate pisaikaiyinira eeroka. ¹²Nokowakotziri eejatzi iri kantakayaawone piñaantyaawori petakotawakagaiya, ari poshiyanaiyaari itsipasatzi atziri. Nokowi poshiyakotenawo naaka netakotzimi eeroka. ¹³Iro iñaantemiri Ashitairi Pawa, kiteshire pinkantanaiya, tekaatsi kantakowaitemine paata arika ripiye Awinkatharite Jesús, intsipatapaiyaari itasorentsitakagairi.

Okaatzi inimotziriri Pawa

4 ¹Ari okantari iyekiite. Iri kantakayaawone Awinkatharite Jesús, nimatantemirori jiroka, shintsi nonkantemiro nonkenkithate. Pairani niyotaakemiro pantayetairo inimotziriri Pawa. Pimatzimaitakawo. Iro kantacha nokowi piyaatakaairo irojatzzi pithotyaaperotantakayaawori.

²Piyotzimaitaka eeroka, iriitake Awinkatharite Jesús matakaakenawori okaatzi niyotaakemiri. ³Jiroka ikowiri Pawa rowameethashiretantemiri: eero pimayempitzi. ⁴Ontzimatyepinkinatantya, inkene impinkathataitemi pitasorentsishiretanaira eeroka. ⁵Eero piñaawenatawo mayempitaantsi, iro rantapiintziri kaari kemisantairine Pawa. ⁶Paamaiya pikantzimoshiryaakaarikari iyeki kemisantanaatsiri. Nokamantzitakemi ketziroini, ari rowasanketakeri Pawa antakerone jiroka. ⁷Te ikowi Pawa oshiyakotyaari mayempiri, ikowatzi rowameethashiretai. ⁸Pithainkanarika naaka, Pawaga pithainkake. Tema Pawa otyaantakemiriri Tasorenkantsi.

⁹Iro nonkenkithatakaimiri tsika okantakota etakotaantsi. Okantawetaka te okowa napiitaimiro eerokapaini, tema pimatairo petakotawakagaiyani, ¹⁰pimatakeri petakotaari iyekiite nampiyetawori piipatsiteki Macedonia-ki. Iro kantacha ontzimatyepiyaatakaairo irojatzipithotyaaaperotantakyaawori. ¹¹Iro pinkowairi pisaikai kameetha. Kaari ikoshekantaita, pantairo pantawairetari eeroka. Iro niyotaayetakemiri pairani. ¹²Iro iñaantemiri kaari kemisantatsine wetsikashire pikantayeta, tekaatsi koityiimotemine.

Ripiyairika Awinkatharite

¹³Iyekiite, nokowi nonkenkithatakoteri kamayetatsiri kemisantzinkari tsika inkantaiya paata. Iro piyotantyaari eeroka, eero poshiyakotantari kaari kemisantatsine, antawoite riraaneenta rowashirewaita eejatzi. ¹⁴Ayotaiyini aaka ikamawetaka Jesús, iro kantzimaitacha rañagai eejatzi. Ari inkantairiri Pawa paata ikaatzi kemisantaitsiri, ari rowañagairi arika ripiyai Jesús. ¹⁵Jiroka riyotagairi Awinkatharite: Paata arika ripiyai, ikaatzi kamayetaintsiri iri etaiyaawone iñaawairi, aaka impoitatsine añaayetzika. ¹⁶Inkemaitawairo inkaimapaake reewarite maninkariite, rityootakaantapaake Pawa. Iri etanakyaawone impiriintanake ikaatzi kamayewetainchari, ¹⁷ampoñaapaakya aakapaini añaayetzika, ari antsipatanaiyaari eethonkitashitawaiyaari Awinkatharite, atonkyotawaiyaari menkoriki. Ari onkantatyeeya antsipataiyaari Awinkatharite. ¹⁸Iroowa jiroka ñaantsi poimoshirenkanta wakayaari.

5 ¹Iro kantzimaitacha iyekiite, tera okowa nonkamantemiro tsikapaite iñagaitero jirokapaini. ²Piyotzimaita eerokapaini, tera riyotakoitziro tsikapaiteka, tema omapokashitaiya, oshiyaawo arika romapokaitai tsireniriki inkoshitaite. ³Intzimawetya kantatsine: “Risaikaite kameetha, inimowaitemi.” Iro kantacha ari romapokantaitake raperotantaite maawoini. Oshiyawaityaawome tsinane onkemaatsiwaitya ontzimaanite, tekaatsi inkenakaitero awisashitantyaari onkaate pokatsine. ⁴Te ari pinkantzimaitya eerokapaini iyekiite, paamaiya romapokaitzimikari,

roshiyakoitapaakyaari koshintzi. ⁵Piyotakotziro eeroka, te poshiyakotari anashiyetachari tsireniriki, te inewenta. Iri poshiyakoty a anashiyetachari kiteesheriki, okoñaatzimotziri. ⁶Ari oshiyawo jiroka, te onkameethate oshiyakotyaaari maatsiri tsireniriki, aamaawenta ankantya oshiyakotyaaari kyoshireri. ⁷Tema tsireniriki rimagaitzi, ari ishinkitaitari eejatzi. ⁸Iro kantacha ayotaiyini aaka, oshiyakotyaaari anashiyetachari kiteesheriki. Wetsikaanta ankantya, ankemisantanetai, etakowaitantya. Oshiyakotyaaari riwetsikaanta owayeri, ikithaatawo kotsirotaki. Oshiyakotyaaari eejatzi rawentaawo kotsiromokotatsiri ramanthaire. Ari ankantyaari aakapaini awentaanaiaawo awisakoshireyetai. ⁹Te ikowi Pawa rowasankeyetai, apatziro ikowi awisakoshireyetai akemisantairira Awinkatharite Jesucristo. ¹⁰Iriitake kamawentakairi. Tekaatzi oitya ankamawetya, arika añaaayetai, ari añaaayetairo asaikimoyetairi paata arika ripiyai. ¹¹Jiroka poimoshirenkantyaariri itsipa, wetsikashire inkantayetya.

Ishintsithatziri Pablo kemisantanaatsiri

¹²Iyekiite, pimpinkathayetairi ikaatzii yotaayetzimiri janta, ari pinkanteri ikaatzii jewayetzimiri pikemisantairira Awinkatharite. Osheki iñaashintsitakowentakemi. ¹³Petakotaiyaari piñiirowa okaatzii rantzimotzimiri. Ontzimatyepisai kayetai kameetha. ¹⁴Pishintsithatairi perantziite, eejatzi pinkantairi makoshiretatsiri. Poimoshirenkairi, powatzinkashireyetairi jentashireri ikemisantzira. Eero pisamawaitari jirikapaini. ¹⁵Te onkameethate pipiyatantya, pinkowaperotairo paakameethatawakagaiya, ari pinkantzitaiyaari kaari pisheninkata. ¹⁶Pinkimoshiretapiintaiyeni. ¹⁷Eero pipakairo pamaña. ¹⁸Oitarika awishimotemine, piwetharyagaiyaari Pawa. Irootake ikowiri antayetairi akemisantairira Jesucristo. ¹⁹Eero pomanonkiro rantakaimiri Tasorenkantsi. ²⁰Eero pimanintziro ikamantaitzimiri. ²¹Ontzimatyepaminawakero kameetharika ikamantaitzimiri. Pinkyaaryoowentanakero owameethashiretantemiri. ²²Okaatzii ikenkithashiretairi kaariperori inatzi, eero pimatziitawo eerokapaini.

²³Nokowakotziri Pawa eekero riyataataayeero rowameethashiretemi eerokapaini, tema iriitake kantakaawori risaikantaitari kameetha. Nokowakotziri raamaakowentaimi maawoini, piwathaki, eejatzi pishireki. Iro ompoñaantyaari eero otzimanta oita inkantakoitemiri paata arika ripiyai Awinkatharite Jesucristo. ²⁴Tema iriiperoshireri rinatzi irirori, aritake rimatakaairo.

Weyaantawori wethataantsi

²⁵Iyekiite, pamanakoyetaina naaka. ²⁶Piwethatenari maawoini kemisantanaatsiri janta. ²⁷Nokowi piñaanateniri

eejatzi jiroka nosankenare, irootake ikowiri Awinkatharite.

²⁸Onkamintha ineshironkataimi Awinkatharite Jesucristo janta. Ari onkantaitatyeyyaani.